

四庫全書

史部

欽定四庫全書

北齊書卷四十四

隋太子通事舍人李百藥撰

列傳第三十六

儒林

李鉉

刁柔

馮偉

張買奴

劉軌思

鮑季詳

邢峙

劉晝

馬敬德

子元熙

張景仁

權會

張思伯

張雕

孫靈暉

石曜

班固稱儒家者流蓋出於司徒之官助人君順陰陽行
教化者也聖人所以明天道正人倫是以古先哲王率
由斯道高祖生於邊朔長於戎馬之間因魏氏喪亂之
餘屬尔朱殘酷之舉文章咸盪禮樂同奔弦歌之音且

絕俎豆之容將盡及仗義建旗掃清區縣以正君臣以齊上下至乎一人播越九鼎潛移文武神器顧眄斯在猶且援立宗支重安社稷豈非跼名教之地漸仁義之風與屬疆場多虞戎車歲駕雖庠序之制有所未遑而儒雅之道遽形心慮魏天平中范陽盧景裕同從兄禮於本郡起逆高祖免其罪置之賓館以經教授太原公以下及景裕卒又以趙郡李同軌繼之二賢並大蒙恩遇待以殊禮同軌之亡復徵中山張雕渤海李鉉刁柔

中山石曜等遞為諸子師友及天保大寧武平之朝亦
引進名儒授皇太子諸王經術然爰自始基暨於李世
唯濟南之在儲宮性識聰敏頗自砥礪以成其美自餘
多驕恣傲狠動違禮度日就月將無聞焉爾鏤冰雕朽
迄用無成蓋有由也夫帝子王孫稟性淫逸况義方之
情不篤邪僻之路競開自非得自生知體包上智而內
有聲色之娛外多犬馬之好安能入便篤行出則友賢
者也徒有師傅之資終無琢磨之實下之從化如風靡

草是以世胄之門罕聞強學若使貴遊之輩飾以明經
可謂稽山竹箭加之以括羽俯拾青紫斷可知焉而齊
氏司存或失其守師保疑丞皆賞勲舊國學博士徒有
虛名唯國子一學生徒數十人耳欲求官正國治其可
得乎胄子以通經仕者唯博陵崔子發廣平宋遊卿而
已自外莫見其人幸朝章寬簡政網踈闊遊手浮惰十
室而九故橫經受業之侶遍於鄉邑負笈從官之徒不
遠千里伏膺無怠善誘不倦入閭里之內乞食為資憩

桑梓之陰動逾千數燕趙之俗此衆尤甚齊制諸郡並立學置博士助教授經學生俱差逼充員士流及豪富之家皆不從調備員既非所好墳籍固不關懷又多被州郡官人驅使縱有遊惰亦不檢治皆由上非所好之所致也諸郡俱得察孝廉其博士助教及遊學之徒通經者推擇充舉射策十條通八以上聽九品出身其尤異者亦蒙抽擢凡是經學諸生多出自魏末大儒徐遵明門下河北講鄭康成所注周易遵明以傳盧景裕及

清河崔瑾景裕傳權會權會傳郭茂權會早入京都郭
茂恒在門下教授其後能言易者多出郭茂之門河南
及青齊之間儒生多講王輔嗣所注周易師訓蓋寡齊
時儒士罕傳尚書之業徐遵明兼通之遵明受業於屯
留王總傳授浮陽李周仁及渤海張文敬及李鉉權會
並鄭康成所注非古文也下里諸生略不見孔氏注解
武平末河間劉光伯信都劉士元始得費彪義疏乃留
意焉其詩禮春秋尤為當時所尚諸生多兼通之三禮

並出遵明之門徐傳業於李鉉沮儁田元鳳馮偉紀顯
敬呂黃龍夏懷敬李鉉又傳授刁柔張買奴鮑季祥邢
峙劉晝熊安生安生又傳孫靈暉郭仲堅丁恃德其後
生能通禮經者多是安生門人諸生盡通小戴禮於周
儀禮兼通者十二三焉通毛詩者多出於魏朝博陵劉
獻之獻之傳李周仁周仁傳董令度程歸則歸則傳劉
敬和張思伯劉軌思其後能言詩者多出二劉之門河
北諸儒能通春秋者並服子慎所注亦出徐生之門張

買奴馬敬德邢峙張思伯張雕劉畫鮑長暄王元則並
得服氏之精微又有衛覬陳達潘叔度雖不傳徐氏之
門亦為通解又有姚文安秦道靜初亦學服氏後更兼
講杜元凱所注其河外儒生俱伏膺杜氏其公羊穀梁
二傳儒者多不措懷論語孝經諸學徒莫不通講諸儒
如權會李鉉刁柔熊安生劉軌思馬敬德之徒多自出
義疏雖曰專門亦皆粗習也今序所錄諸生或終於魏
朝或名宦不達縱能名家又闕其由來及所出郡國並

略存其姓名而已俱取其尤通顯者列於儒林云熊安生名在周史光伯元士著於隋書輒不重述

李鉉字寶鼎渤海南皮人也九歲入學書急就篇月餘便通家素貧苦常春夏務農冬乃入學年十六從浮陽李周仁受毛詩尚書章武劉子猛受禮記常山房蚪受周官儀禮漁陽鮮于靈馥受左氏春秋鉉以鄉里無可師者遂與州里楊元懿河間宗惠振等結侶詣大儒徐遵明受業居徐門下五年常稱高第二十三便自潜居

討論是非撰定孝經論語毛詩三禮義疏及三傳異同
周易義例合三十餘卷用心精苦曾三冬不畜枕每至
睡時假寐而已年二十七歸養二親因教授鄉里生徒
恒至數百燕趙間能言經者多出其門年三十六丁父
喪服闋以鄉里寡文籍來遊京師讀所未見書州舉秀
才除太學博士武定中李同軌卒後高祖令世宗在京
妙簡碩學以教諸子世宗以鉉應旨徵詣晉陽時中山
石曜北平陽絢北海王晞清河崔瞻廣平宋欽道及工

書人韓毅同在東館師友諸王鉉以去聖久遠文字多有乖謬感孔子必也正名之言乃喟然有刊正之意於講授之暇遂覽說文爰及倉雅刪正六藝經注中謬字名曰字辨顯祖受禪從駕還都天保初詔鉉與殿中尚書邢邵中書令魏收等參議禮律仍兼國子博士時詔北平太守宋景業西河太守綦母懷文等草定新歷錄尚書平原王高隆之令鉉與通直常侍房延祐國子博士刁柔參考得失尋正國子博士廢帝之在東宮顯祖

詔鉉以經入授甚見優禮數年病卒特贈廷尉少卿及還葬故郡太子致祭奠之禮并使王人將送儒者榮之楊元懿宗惠振官亦俱至國子博士

刁柔字子溫渤海饒安人也父整魏車騎將軍贈司空柔少好學綜習經史尤留心禮儀性強記至於氏族內外多所諳悉初為世宗挽郎出身司空行參軍喪母居喪以孝聞永安中除中堅將軍奉車都尉加冠軍將軍中散大夫元象中隨例到晉陽高祖以為永安公府長

流參軍又令教授諸子天保初除國子博士中書舍人
魏收撰魏史啓柔等與同其事柔性頗專固自是所聞
收常所嫌憚又參議律令時議者以為立五等爵邑承
襲者無嫡子立嫡孫無嫡孫立嫡子弟無嫡子弟立嫡
子孫弟柔以為無嫡孫應立嫡曾孫不應立嫡子弟議
曰柔案禮立適以長故謂長子為嫡子嫡子死以嫡子
之子為嫡孫死則曾玄亦然然則嫡子之名本為傳重
故喪服曰庶子不為長子三年不繼祖與禰也禮記公

儀仲子之喪檀弓曰何居我未之前聞仲子舍其孫而立其弟何也子服伯子曰仲子亦猶行古人之道也昔者文王舍伯邑考而立武王發微子舍其孫盾而立弟衍仲子亦猶行古之道也鄭注曰仲子為親者諱耳立子非也文王之立武王權也微子嫡子死立其弟衍殷禮也子游問諸孔子孔子曰不立孫注曰據周禮然則商以嫡子死立嫡子之母弟周以嫡子死立嫡子之子為嫡孫故春秋公羊之義嫡子有孫而死質家親親先

立弟文家尊尊先立孫喪服云為父後者為出母無服
小記云祖父卒而後為祖母後者三年為出母無服者
喪者不祭故也為祖母三年者大宗傳重故也今議以
嫡子孫死而立嫡子母弟嫡子母弟者則為父後矣嫡
子母弟本非承嫡以無嫡故得為父後則嫡孫之弟理
亦應得為父後則是父卒然後為祖後者服斬既得為
祖服斬而不得為傳重者未之聞也若用商家親親之
義本不應嫡子死而立嫡子孫若從周家尊尊之文豈

宜舍其孫而立其弟或文或質愚用惑焉小記復云嫡婦不為舅姑後者則舅姑為之小功注云謂夫有廢疾他故若死無子不受重者小功庶婦之服凡父母於子舅姑於婦將不傳重於嫡及將所傳重者非嫡服之皆如衆子庶婦也言死無子者謂絕世無子非謂無嫡子如其有子焉得云無後夫雖廢疾無子婦猶以嫡為名嫡名既在而欲廢其子者其如禮何禮有損益代相沿革必謂宗嫡可得而變者則為後服斬亦宜有因而改

七年夏卒時年五十六柔在史館未久逢勒成之際志存偏黨魏書中與其內外通親者並虛美過實深為時論所譏焉

馮偉字偉節中山安喜人也身長八尺衣冠甚偉見者肅然敬憚少從李寶鼎遊學李重其聰敏恒別意試問之多所通解尤明禮傳後還鄉里閉門不出將三十年不問生產不交賓客專精覃思無所不通趙郡王出鎮定州以禮迎接命書三至縣令親至其門猶辭疾不起

王將命駕致請佐史前後星馳報之縣令又自為其整冠履不得已而出王下廳事迎之止其拜伏分階而上留之賓館甚見禮重王將舉充秀才固辭不就歲餘請還王知其不願拘束以禮發遣贈遺甚厚一無所納唯受時服而已及還終不交人事郡守縣令每親至其門歲時或置羊酒亦辭不納門徒束修一毫不受耕而飯蠶而衣簞食瓢飲不改其樂竟以壽終

張買奴平原人也經義該博門徒千餘人諸儒咸推重

之名聲甚盛歷太學博士國子助教天保中卒

劉軌思渤海人也說詩甚精少事同郡劉敬和敬和事同郡程歸則故其鄉曲多為詩者軌思天統中任國子博士

鮑季詳渤海人也甚明禮聽其離文析句自然大略可解兼通左氏春秋少時恒為李寶鼎都講後亦自有徒衆諸儒稱之天統中卒於太學博士從弟長暄兼通禮傳武平末為任城王潛丞相掾恒在京教授貴遊子弟

齊亡後歸鄉里講經卒於家

邢峙字士峻河間鄭人也少好學耽翫墳典遊學燕趙之間通三禮左氏春秋天保初郡舉孝廉授四門博士遷國子助教以經入授皇太子峙方正純厚有儒者之風厨宰進太子食有菜曰邪蒿峙命去之曰此菜有不正之名非殿下所宜食顯祖聞而嘉之賜以被褥縑纈拜國子博士皇建初除清河太守有惠政民吏愛之以年老謝病歸卒於家

劉晝字孔昭渤海阜城人也少孤貧愛學負笈從師伏
膺無倦與儒者李寶鼎同鄉里甚相親愛受其三禮又
就馬敬德習服氏春秋俱通大義恨下里少墳籍便杖
策入都知太府少卿宋世良家多書乃造焉世良納之
恣意披覽晝夜不息河清初還冀州舉秀才入京考策
不第乃恨不學屬文方復緝綴辭藻言甚古拙制一首
賦以六合為名自謂絕倫吟諷不輟乃歎曰儒者勞而
少工見於斯矣我讀儒書二十餘年而答策不第始學

作文便得如是會以此賦呈魏收收謂人曰賦名六合其愚已甚及見其賦又愚於名畫又撰高才不遇傳三篇在皇建太寧之朝又頻上書言亦切直多非世要終不見收采自謂博物奇才言好矜大每云使我數十卷書行於後世不易齊景之千駟也而容止舒緩舉動不倫由是竟無仕進天統中卒於家年五十二

馬敬德河間人也少好儒術負笈隨大儒徐遵明學詩禮略通大義而不能精遂留意於春秋左氏沈思研求

晝夜不倦解義為諸儒所稱教授於燕趙間生徒隨之者衆河間郡王每於教學追之將舉為孝廉固辭不就乃詣州求舉秀才舉秀才例取文士州將以其純儒無意推薦敬德請試方略乃策問之所答五條皆有文理乃欣然舉送至京依秀才策問唯得中第乃請試經業問十條並通擢授國子助教遷太學博士天統初除國子博士世祖為後主擇師傅趙彥深進之入為侍講其妻夢猛獸將來向之敬德走超叢棘妻伏地不敢動敬

德占之曰吾當得大官超棘過九卿也爾伏地夫人也
後主既不好學敬德侍講甚疎時時以春秋入授武平
初猶以師傅之恩超拜國子祭酒加儀同三司金紫光
祿大夫領瀛州大中正卒贈開府瀛滄安州諸軍事瀛
州刺史其後侍書張景仁封王趙彥深云何容侍書封
王侍講翻無封爵於是亦封敬德廣漢郡王子元熙襲
元熙字長明少傳父業兼事文藻以父故自青州集曹
參軍超遷通直侍郎待詔文林館轉正員武平中皇太

子將講孝經有司請擇師友帝曰馬元熙朕師之子文學不惡可令教兒於是以孝經入授皇太子儒者榮其世載性和厚在內甚得名譽皇太子亦親敬之隋開皇中卒於秦王文學

張景仁者濟北人也幼孤家貧以學書為業遂工草隸選補內書生與魏郡姚元標潁川韓毅同郡袁買奴滎陽李超等齊名世宗並引為賓客天保八年敕授太原王紹德書除開府參軍後主在東宮世祖選善書人性

行淳謹者令侍書景仁遂被引擢小心恭慎後主愛之
呼為博士歷太子門大夫員外散騎常侍諫議大夫後
主登祚除通直散騎常侍及奏御筆點除通字遂正常
侍左右與語猶稱博士胡人何洪珍有寵於後主欲得
通婚朝士以景仁在內官位稍高遂為其兄子取景仁
第二息子瑜之女因此表裏恩遇日隆景仁多疾每遣
徐之範等治療給藥物珍羞中使問疾相望於道是後
敕有司恒就宅送御食遷假儀同三司銀青光祿大夫

食恒山縣幹車駕或有行幸在道宿處每送步障為遮
風寒進位儀同三司尋加開府侍書餘官並如故每旦
須參即在東宮停止及立文林館中人鄧長顥希旨奏
令總制館事除侍中四年封建安王洪珍死後長顥猶
存舊款更相彌縫得無墜退除中書監以疾卒贈侍中
齊濟等五州刺史司空公景仁出自寒微本無識見一
旦開府侍中封王其妻姓奇莫知氏族所出容制音辭
事事庸俚既詔除王妃與諸公主郡君同在朝謁之列

見者為其慙悚子瑜薄傳父業更無餘伎以洪珍故擢授中書舍人轉給事黃門侍郎長息子玉起家員外散騎侍郎景仁性本卑謙及用胡人巷伯之勢坐致通顯志操頗改漸成驕傲良馬輕裘徒從擁冗高門廣宇當衢向術諸子不思其本自許貴遊自蒼頡以來八體取進一人而已

權會字正理河間鄭人也志尚沈雅動遵禮則少受鄭易探蹟索隱妙盡幽微詩書三禮文義該洽兼明風角

妙識玄象魏武定初本郡貢孝廉策居上第解褐四門
博士僕射崔暹引為館客甚敬重焉命世子達等盡師
傅之禮會因此聞達暹欲薦會與馬敬德等為諸王師
會性恬靜不慕榮勢恥於仕宦固辭暹亦識其意遂罷
薦舉尋被尚書符追著作修國史監知太史局事皇建
中轉加中散大夫餘並如故會參掌雖繁教授不闕性
甚懦悞似不能言及臨機答難酬報如響動必稽古辭
不虛發由是為儒宗所推而貴遊子弟慕其德義者或

就其宅或寄宿鄰家晝夜承間受其學業會欣然演說未嘗懈怠雖明風角解玄象至於私室輒不及言學徒有請問者終無所說每云此學可知不可言諸君並貴遊子弟不由此進何煩問也會唯有一子亦不以此術教之其謹密也如此曾令家人遠行久而不反其行還垂欲至宅乃逢寒雪寄息他舍會方處學堂講說忽有旋風瞥然吹雪入戶會乃笑曰行人至何意中停遂命使人令詣某處追尋果如其語每為人占筮小大必中

但用爻辭象象以辯吉凶易占之屬都不經口會本貧
生無僕隸初任助教之日恒乘驢上下且其職事處多
每須經歷及其退食非晚不歸曾夜出城東門鐘漏已
盡會唯獨乘驢忽有二人一人牽頭一人隨後有似相
助其回動輕漂有異生人漸漸失路不由本道會心甚
怪之遂誦易經上篇一卷不盡前後二人忽然離散會
亦不覺墮驢因爾迷悶至明始覺方知墮驢之處乃是
郭外纔去家數里有一子字子襲聰敏精勤幼有成人

之量不幸先亡臨送者為其傷慟會唯一哭而罷時人尚其達命武平年自府還第在路無故馬倒遂不得語因爾暴亡時年七十六注易一部行於世會生平畏馬位望既至不得不乘果以此終

張思伯河間樂城人也善說左氏傳為馬敬德之次撰刊例十卷行於時亦治毛詩章句以二經教齊安王廓武平初國子博士

張雕中山北平人也家世貧賤而慷慨有志節雅好古

學精力絕人負篋從師不遠千里徧通五經尤明三傳
弟子遠方就業者以百數諸儒服其強辨魏末以明經
召入霸府高祖令與諸子講讀起家殄寇將軍稍遷太
尉長流參軍定州主簿從世宗赴并除常山府長流參
軍天保中為永安王府參軍事顯祖崩於晉陽擢兼祠
部郎中典喪事從梓宮還鄴乾明初除國子博士遷平
原太守坐贓賄失官世祖即位以舊恩除通直散騎侍
郎琅邪王儼求博士精儒學有司以雕應選時號得人

尋為涇州刺史未幾拜散騎常侍復為儼講值帝侍講馬敬德卒乃入授經書帝甚重之以為侍讀與張景仁並被尊禮同入華光殿共讀春秋加國子祭酒假儀同三司待詔文林館胡人何洪珍大蒙主上親寵與張景仁結為婚媾雕以景仁宗室自託於洪珍傾心相禮情好日密公私之事雕常為其指南時穆提婆韓長鸞與洪珍同侍帷幄知雕為洪珍謀主甚忌惡之洪珍又奏雕監國史尋除侍中加開府奏度支事大被委任言多

見從特敕奏事不趨呼為博士雕自以出於微賤致位大臣勵精在公有匪躬之節欲立功效以報朝恩論議抑揚無所回避宮掖不急之費大存減省左右縱恣之徒必加禁約數譏切寵要獻替帷扆上亦深倚仗之方委以朝政雕便以澄清為已任意氣甚高嘗在朝堂謂鄭子信曰向入省中見賢家唐令處分極無所以若作數行兵帳雕不如邕若致主堯舜身居稷契則邕不如我其矜誕如此長鸞等慮其干政不已陰圖之會雕與

侍中崔季舒等諫帝幸晉陽長鸞因譖之故俱誅死臨
刑帝令段孝言詰之雕致對曰臣起自諸生謬被擢
接事累世常蒙恩遇位至開府侍中光寵隆洽每思塵
露微益山海今者之諫臣實首謀意善形惡無所逃死
伏願陛下珍愛金玉開發神明數引賈誼之倫論說治
道令聽覽之間無所擁蔽則臣雖死之日猶生之年歔
歔流涕俯而就戮侍衛左右莫不憐而壯之時年五十
五子德冲等徙於北邊南安之反德冲及弟德揭俱死

德冲和謹謙讓善於人倫聰敏好學頗涉文史以帝師之子早見旌擢歷員外散騎侍郎太師府掾入為中書舍人隨例待詔其父之戮也德冲在殿庭執事目見冤酷號哭殞絕於地久之乃蘇

孫靈暉長樂武強人也魏大儒秘書監惠蔚靈暉之族曾王父也靈暉少明敏有器度惠蔚一子早卒其家書籍多在焉靈暉年七歲便好學日誦數千言唯尋討惠蔚手錄章疏不求師友三禮及三傳皆通宗肯始就鮑

季詳熊安生質問疑滯然其所發明熊鮑無以異也舉冀州刺史秀才射策高第授員外將軍後以儒術甄明擢授太學博士遷北徐州治中轉潼郡太守天統中敕令朝臣推舉可為南陽王綽師者吏部尚書尉瑾表薦之徵為國子博士授南陽王經王雖不好文學亦甚相敬重啟除其府諮議參軍綽除定州刺史仍隨之鎮綽所為猖獗靈暉唯默默憂賴不能諫止綽欲以管記馬子結為諮議參軍乃表請轉靈暉為王師以子結為諮

議朝廷以王師三品啟奏不合後主於啟下手答云但
用之仍手報南陽書並依所奏儒者甚以為榮綽除大
將軍靈暉以王師領大將軍司馬綽誅停廢從綽死後
每至七日及百日終靈暉恒為綽請僧設齋傳經行道
齊亡後數年卒子萬壽聰識機警博涉羣書禮傳俱通
大義有辭藻尤甚詩詠齊末陽休之辟為開府行參軍
隨奉朝請滕王文學豫章長史卒於大理司直馬子結
者其先扶風人也世居涼土太和中入洛父祖俱清官

子結兄弟三人皆涉文學陽休之牧西兗子廉子尚子
結與諸朝士各有詩言贈陽總為一篇酬答即詩云三
馬俱白眉者也子結以開府行參軍擢為南陽王管記
隨綽定州綽每出遊獵必令子結走馬從禽子結既儒
緩衣垂帽落或噉或啼令騎驅之非墜馬不止綽以為
歡笑由是漸見親狎啟為諮議云

石曜字白曜中山安喜人亦以儒學進居官至清儉武
平中黎陽郡守值斛律武都出為兗州刺史武都即丞

相咸陽王世子皇后之兄性甚貪暴先過衛縣令丞以
下聚斂絹數千匹以遺之及至黎陽令左右諷動曜及
郡治下縣官曜手持一縑而謂武都曰此是老石機杼
以奉贈自此來並須出於吏民吏民之物一毫不敢
輒犯武都亦知曜清素純儒笑而不責著石子十卷言
甚淺俗後終於譙州刺史此外行事史闕焉
贊曰大道既隱名教是薄以斯建國以此立身帝圖雜
霸儒風未純何以不墜弘之在人

北齊書卷四十四

北齊書卷四十四考證

儒林傳魏天平中范陽盧景裕同從兄禮於本郡起逆

○兄字下應有一仲字

徐傳業於李鉉沮儁○北史沮作祖

詔鉉與殿中尚書邢邵中書令魏收等參議禮律○

臣

範

按齊制六尚書有殿中尚書但考邢傳不聞居此

官

仲子舍其孫而立其弟○弟當作子

權會傳恥於仕宦○北史仕宦作左官

孫靈暉傳長樂武強人也○北史作武邑武遂人

北齊書卷四十四考證

欽定四庫全書

史部

北齊書卷四十五

詳校官編修_臣李堯棟

洗馬_臣王坦修覆勘

覆校官中書_臣馮培

校對官中書_臣王鍾泰

謄錄監生_臣熊灝

欽定四庫全書

北齊書卷四十五

隋太子通事舍人

列傳第三十七

文苑

祖鴻勳

李廣

樊遜

李百藥撰

劉 逖

荀士遜

顏之推

袁爽
朱才

韋道遜
荀仲舉

江旰
蕭慤

睦 豫
古道子

夫玄象著明以察時變天文也聖達立言化成天下人
文也達幽顯之情明天人之際其在文乎逖聽三古彌
綸百代制禮作樂騰實飛聲若或言之不文豈能行之
遠也子曰文王既沒文不在茲大聖踵武邈將千載其
間英賢卓犖不可勝紀咸宜韜筆寢牘未可言文斯固

才難不其然也至夫游夏以文詞擅美顏回則庶幾將
聖屈宋所以後塵卿雲未能輟簡於是辭人才子波駭
雲屬振鷁鷺之羽儀縱雕龍之符采人謂得玄珠於赤
水策奔電於崑丘開四照於春華成萬寶於秋實然文
之所起情發於中人有六情稟五常之秀情感六氣順
四時之序其有帝資懸解天縱多能摘黼黻於生知問
珪璋於先覺譬雕雲之自成五色猶儀鳳之冥會八音
斯固感英靈以特達非勞心所能致也縱其情思底滯

關鍵不通但伏膺無怠鑽仰斯切馳騫勝流周旋益友
彊學廣其聞見專心屏於涉求畫績飾以丹青彫琢成
其器用是以學而知之猶足賢乎已也謂石為獸射之
洞開精之至也積歲解牛砉然游刃習之久也自非渾
沌無可鑿之姿窮奇懷不移之情安有至精久習而不
成功者焉善乎魏文之著論也人多不彊力貧賤則懾
於饑寒富貴則流於逸樂遂營目前之務而遺千載之
功日月逝於上體貌衰於下忽然與萬物遷化斯志士

大痛也沈休文云自漢至魏四百餘年辭人才子文體
三變然自茲厥後軌轍尤多江左梁末彌尚輕險始自
儲宮刑乎流俗雜蒔憑以成音故雖悲而不雅爰逮武
平政乖時蠹唯藻思之美雅道猶存履柔順以成文蒙
大難而能正原夫兩朝叔世俱肆淫聲而齊氏變風屬
諸絃管梁時變雅在夫篇什莫非易俗所致竝為亡國
之音而應變不殊感物或異何哉蓋隨君上之情欲也
有齊自霸圖云啓廣延髦儁開四門以納之舉八絃以

掩之鄴京之下煙霏霧集河間邢子才鉅鹿魏伯起范陽盧元明鉅鹿魏李景清河崔長儒河間邢子明范陽祖孝徵樂安孫彥舉中山杜輔玄北平陽子烈竝其流也復有范陽祖鴻勳亦參文士之列天保中李愔陸邱崔瞻陸元規竝在中書參掌綸誥其李廣樊遜李德林盧詢祖盧思道始以文章著名皇建之朝常侍王晞獨擅其美河清天統之辰杜臺卿劉逖魏騫亦參知詔敕自愔以下在省唯撰述除官詔旨其關涉軍國文翰多

是魏收作之及在武平李若荀士遜李德林薛道衡為
中書侍郎諸軍國文書及大詔誥俱是德林之筆道衡
諸人皆不預也後主雖溺於羣小然頗好諷詠幼稚時
曾讀詩賦語人云終有解作此理不及長亦少留意初
因畫屏風敕通直郎蘭陵蕭放及晉陵王孝式錄古名
賢烈士及近代輕豔諸詩以充圖畫帝彌重之後復追
齊州錄事參軍蕭慤趙州功曹參軍顏之推同入撰次
猶依霸朝謂之館客放及之推意欲更廣其事又祖珽

輔政愛重之推又託鄧長顥漸說後主屬意斯文三年
祖珽奏立文林館於是更召引文學士謂之待詔文林
館焉珽又奏撰御覽詔珽及特進魏收太子太師徐之
才中書令崔劼散騎常侍張雕中書監陽休之監撰珽
等奏追通直散騎侍郎韋道遜陸乂太子舍人王邵衛
尉丞李孝基殿中侍御史魏澹中散大夫劉仲威袁爽
國子博士朱才奉車都尉睦道閑考功郎中崔子樞左
外兵郎薛道衡并省主客郎中盧思道司空東閣祭酒

崔德太學博士諸葛漢奉朝請鄭公超殿中侍御史鄭子信等入館撰書并敕放慤之推等同入撰例復令散騎常侍封孝琰前樂陵太守鄭元禮衛尉少卿杜臺卿通直散騎常侍王訓前兗州長史羊肅通直散騎常侍馬元熙并省三公郎中劉珉開府行參軍李師正溫君悠入館亦令撰書復命特進崔季舒前仁州刺史劉逖散騎常侍李孝貞中書侍郎李德林續入待詔尋又詔諸人各舉所知又有前濟州長史李翥前廣武太守魏

騫前西兗州司馬蕭漑前幽州長史陸仁惠鄭州司馬
江旰前通直散騎侍郎辛德源陸開明通直郎封孝騫
太尉掾張德沖并省右民郎高行恭司徒戶曹參軍古
道子前司空功曹參軍劉顗獲嘉令崔德儒給事中李
元楷晉州治中陽師孝太尉中兵參軍劉儒行司空祭
酒陽辟疆司空士曹參軍盧公順司徒中兵參軍周子
深開府參軍王友伯崔君洽魏師審竝入館待詔又敕
右僕射段孝言亦入焉御覽成後所撰錄人亦有不時

待詔付所司處分者凡此諸人亦有文學膚淺附會親
識妄相推薦者十三四焉雖然當時操筆之徒搜求略
盡其外如廣平宋孝王信都劉善經輩三數人論其才
性入館諸賢亦十三四不逮之也待詔文林亦是一時
盛事故存錄其姓名自邢子才以還或身終魏朝已入
前史或名位既重自有列傳或附其家世或名存後書
輒略而不載今綴序祖鴻勳等列於文苑者焉自外有
可錄者存之篇末

祖鴻勳涿郡范陽人也父慎仕魏歷鴈門咸陽太守治有能名卒於金紫光祿大夫贈中書監幽州刺史諡惠侯鴻勳弱冠與同郡盧文符竝為州主簿僕射臨淮王或表薦鴻勳有文學宜試以一官敕除奉朝請人謂之曰臨淮舉卿便以得調竟不相謝恐非其宜鴻勳曰為國舉才臨淮之務祖鴻勳何事從而謝之或聞而喜曰吾得其人矣及葛榮南逼出為防河別將守滑臺永安初元擢為東道大使署封隆之邢邵李渾李象鴻勳竝

為子使除東濟北太守以父老疾為請竟不之官後城
陽王徽奏鴻勳為司徒法曹參軍事赴洛徽謂之曰吾
聞臨淮相舉竟不到門今來何也鴻勳曰今來赴職非
為謝恩轉廷尉正後去官歸鄉里與陽休之書曰陽生
大弟吾比以家貧親老時還故郡在本縣之西界有雕
山焉其處閑遠水石清麗高巖四匝良田數頃家先有
野舍於斯而遭亂荒廢今復經始即石成基憑林起棟
蘿生映宇泉流繞階月松風草綠庭綺合日華雲實傍

沼星羅簷下流煙共霄氣而舒卷園中桃李雜椿柏而
蔥蒨時一褰裳涉澗負杖登峯心悠悠以孤上身飄飄
而將逝杳然不復自知在天地間矣若此者久之乃還
所住孤坐危石撫琴對水獨詠山阿舉酒望月聽風聲
以興思聞鶴唳以動懷企莊生之逍遙慕尚子之清曠
首戴萌蒲身衣緼襪出藝梁稻歸奉慈親緩步當車無
事為貴斯已適矣豈必撫塵哉而吾生既繫名聲之韁
鑣就良工之剗劂振佩紫臺之上鼓袖丹墀之下采金

匱之漏簡訪玉山之遺文敝精神於丘墳盡心力於河
漢摘藻期之聲繡發議必在芬香茲自美耳吾無取焉
嘗試論之夫崑峯積玉光澤者前毀瑤山叢桂芳茂者
先折是以東都有挂冕之臣南國見捐情之士斯豈惡
梁錦好蔬布哉蓋欲保其七尺終其百年耳今第官位
既達聲華已遠象由齒斃膏用明煎既覽老氏谷神之
談應體留侯止足之逸若能飜然清尚解佩捐簪則吾
於茲山莊可辦一得把臂入林挂巾垂枝攜酒登巘舒

席平山道素志論舊款訪丹法語立書斯亦樂矣何必
富貴乎去矣陽子途垂趣別緬尋此旨杳若天漢已矣
哉書不盡意梁使將至敕鴻勳對客高祖曾徵至并州
作晉祠記好事者翫其文位至高陽太守在官清素妻
子不免寒餒時議高之天保初卒官

李廣字弘基范陽人也其先自遼東徙焉廣博涉羣書
有才思文議之美少與趙郡李謩齊名為邢魏之亞而
訥於言敏於行魏安豐王廷明鎮徐州署廣長流參軍

釋褐盪逆將軍介朱仲遠牒為大將軍記室加諫議大
夫荊州行臺辛纂上為行臺郎中尋為車騎府錄事參
軍中尉崔暹精選御史皆是世胄廣獨以才學兼御史
修國史南臺文奏多其辭也平陽公淹辟為中尉轉侍
御史顯祖初嗣霸業命掌書記天保初欲以為中書郎
遇其病篤而止廣曾欲早朝未明假寐忽驚覺謂其妻
云吾向似睡忽見一人出吾身中語云君用心過苦非
精神所堪今辭君去因而恍惚不樂數日便遇疾積年

不起資產屢空藥石無繼廣雅有鑒識度量弘遠坦平
無私為士流所愛歲時共瞻遺之賴以自給竟以疾終
曾薦畢義雲於崔暹廣卒後義雲集其文筆十卷託魏
收為之叙其族人子道亦有文章

樊遜字孝謙河東北猗氏人也祖琰父衡竝無官宦而
衡性至孝喪父負土成墳植柏方數十畝朝夕號慕遜
少學常為兄仲優饒既而自責曰名為人弟獨受安逸
可不愧於心乎欲同勤事業母馮氏謂之曰汝欲謹小

行耶遜感母言遂專心典籍恒書壁作見賢思齊四字
以自勸勉屬本州淪陷寓居鄴中為臨漳小吏縣令裴
鑒莅官清苦致白雀等瑞遜上清德頌十首鑒大加賞
重擢為主簿仍薦之於右僕射崔暹與遼東李廣渤海
封孝琰等為暹賓客人有譏其靖默不能趣時者遜常
服東方朔之言陸沉世俗避世金馬何必深山蒿廬之
下遂借陸沉公子為主人擬客難製客誨以自廣後崔
暹大會賓客大司馬襄城王元旭時亦在坐論欲命府

僚選指遜曰此人學富才高兼之佳行可為王參軍也
旭目之曰豈能就耶遜曰家無蔭第不敢當此武定七
年世宗崩遜徙於邊裔賓客咸散遜遂往陳留而居之
梁州刺史劉殺鬼以遜兼錄事參軍仍舉秀才尚書案
舊令下州三載一舉秀才為五年已貢開封人鄭祖獻
計至此年未合兼別駕王聰抗議右丞陽斐不能却尚
書令高隆之曰雖遜才學優異待明年仕非遠遜竟還
本州八年轉兼長史從軍南討軍還殺鬼移任潁川又

引遜兼潁州長史天保元年本州復召舉秀才二年春
會朝堂對策罷中書郎張子融奏入至四年五月遜與
定州秀才李子宣等以對策三年不調被付外上書請
從聞罷詔不報梁州重表舉遜為秀才五年正月制詔
問升中紀號遜對曰臣聞巡獄之禮勒在虞書省方之
義著於易象往帝前王匪唯一姓封金刊玉億有餘人
仲尼之觀梁甫不能盡識夷吾之對齊桓所存未幾然
盛德之事必待太平苟非其人更貽靈譴秦皇無道致

雨風之災漢武奢淫有奉車之害及文叔受命炎精更
輝四海安流天下輯睦劔賜騎士馬駕鼓車乃用張純
之文始從伯陽之說至於魏晉雖各有君量德而處莫
能擬議蔣濟上言於前徒穢紙墨袁淮發論於後終未
施行世歷三朝年將十祀啓聖之期茲為昌會然自水
德不競函谷封塗天馬息歌苞茅絕貢我太祖收寶鷄
之瑞握鳳皇之書體一德以匡朝屈三分而事主蕩此
妖寇易如沃雪但昌既受命發乃行誅雖太白出高中

國宜戰置之度外望其遷善伏惟陛下以神武之姿天
然之略馬多冀北將異山西涼風至白露下北上太行
東臨碣石方欲吞巴蜀而掃崑函苑長洲而池江漢復
恐迎風縱火芝艾共焚按此六軍未申九伐夫周發牙
璋漢馳竹使義在濟民非聞好戰至如投鼠忌器之說
蓋是常談文德懷遠之言豈識權道今三臺令子六郡
良家蓄銳須時裹糧待詔未若龍駕虎服先收隴右之
民電轉雷驚因取荆南之地昔秦舉長平金精食昴楚

攻鉅鹿枉矢霄流況我威靈能無協讚但使彼之百姓
一覩六軍似見周王若逢司隸然後除其苛令與其約
法振旅而還止戈為武標金南海勒石東山紀天地之
奇功被風聲於千載若令馬兒不死子陽尚在便欲案
明堂之圖草射牛之禮比德論功多慙往列升中告禪
臣用有疑又問求才審官遜對曰臣聞彫獸畫龍徒有
風雲之勢金舟玉馬終無水陸之功三駕禮賢將收實
用一毛不拔復何足取是以堯作虞賓遂全箕山之操

周移商鼎不納孤竹之言但處士盜名雖云久矣朝臣
竊位蓋亦實多漢拜丞相便有鍾鼓之妖魏用三公乃
至孫權之笑故山林之與朝廷得容非毀肥遯之與賓
王翻有優劣至於時非蹈海而曰羞作秦民事異出關
而言恥從衛亂雖復星干帝座不易高尚之心月犯少
微終存耿介之志自我太嶽之後克廣洪業禹至神宗
舜格文祖陛下受天之明命光華日月爰自納麓乃格
文祖儀天地以設官象星辰而布職漢家神鳳慙用紀

年魏氏青龍羞將改號上膺列宿咸是異人下法山川
莫非奇士所以畫堂甲觀修德日新廟鼎歌鍾王勳歲
委循名責實選衆舉能朝無銅臭之公世絕錢神之論
昔百里相秦名存雀籙蕭張輔沛姓在河書今日公卿
抑亦天授與之為治何欲不遂未必稽首天師方聞牧
馬之術膝行山上始得治身之道但使帝德休明自彊
不息甲夜觀書支日通奏周昌桀紂之論欣然開納劉
毅桓靈之比終自含弘高懸王爵唯能是與管庫靡遺

漁鹽畢錄無令桓譚非讖官止於郡丞趙壹負才位終
於計掾則天下宅心幽明知感歲精仕漢風伯朝周真
人去而復歸台星坼而還歛詩稱多士易載羣龍從此
而言可以無愧又問釋道兩教遜對曰臣聞天道性命
聖人所不言蓋以理絕涉求難為稱詣伯陽道德之論
莊周逍遙之旨遺言取意猶有可尋至若玉簡金書神
經秘錄三尺九轉之奇絳雪玄霜之異淮南成道犬吠
雲中子喬得仙劔飛天上皆是憑虛之說海棗之談求

之如係風學之如捕影而燕君齊后秦皇漢帝信彼方
士冀遇其真徐福去而不歸藥大往而無獲猶謂升遐
倒影抵掌可期祭鬼求神庶或不死江璧既返還入驪
山之墓龍媒已至終下茂陵之墳方知劉向之信洪寶
沒有餘責王充之非黃帝比為不相又末葉已來大存
佛教寫經西土畫像南宮昆池地黑以為燒劫之灰春
秋夜明謂是降神之日法王自在變化無窮置世界於
微塵納須彌於黍米蓋理本虛無示諸方便而妖妄之

輩棄家出家藥王燔軀波斯灑血假未能然猶當克命
寧有改形易貌有異生人恣意放情還同俗物龍宮餘
論鹿野前言此而得容道風前陞伏惟陛下受天明命
屈已濟民山鬼効靈海神率職湘中石驚沐時雨而羣
飛臺上銅鳥翹和風而杓轉以周都洛邑治在鎬京漢
宅咸陽魂歸豐沛汾晉之地王迹維始眷言巡幸且勞
經略猶復降情文苑斟酌百家想執玉於瑤池念求珠
於赤水竊以王母獻環由感周德上天錫珮實報禹功

二班勒史兩馬製書未見三世之辭無聞一乘之旨帝
樂王禮尚有時而公革左道怪民亦何疑於沙汰又問
刑罰寬猛遜對曰臣聞惟王建國刑以助禮猶寒暑之
贊陰陽山川之通天地爰自末葉法令稍滋秦篆無以
窮書楚竹不能盡載有司因此開以二門高下在心寒
熱隨意周官三典棄之若吹毛漢律九章違之如覆手
遂使長平獄氣得酒而後消東海孝婦因災而方雪詔
書挂壁有善而莫遵姦吏到門無求而不可皆由上失

其道民不見德而議者守迷不尋其本鍾繇王朗追怨
張蒼祖訥梅陶共尤文帝便謂化屍起偃在復肉刑致
治興邦無關周禮伏惟陛下昧爽坐朝留心政術明罰
以糾諸侯申恩以孩百姓黃旗紫蓋已絕東南白馬素
車將降軹道若復峻典深文臣實未悟何則人肖天地
俱稟陰陽安則願存擾則圖死故王者之治務先禮樂
如有未從刑書乃用寬猛兼設水火俱陳未有專任商
韓而能長久昔秦歸士會晉盜來奔舜舉臯陶不仁自

遠但令釋之定國迭作理官龔遂文翁繼為郡守科間
律令一此憲章欣聞汲黯之言泣斷昭平之罪則天下
自治大道公行乳獸含牙蒼鷹垂翅楚王錢府不復須
封漢獄冤囚自然蒙理後服之徒既承風而慕化有截
之內皆蹈德而詠仁號以成康何難之有又問禍福報
應遜對曰臣聞五方易辨尚待指南百世可知猶須吹
律况復天道秘遠神迹難源不有通靈孰能盡悟秉查
至於河漢唯覩牽牛假寐遊於上玄止逢翟火造化之

理既寂寞而無傳報應之來固難得而妄說但秦穆有道勾芒錫祥號公涼德蓐收降禍高明在上定自有知不可謂神冥昧難信若夫仲尼厄於陳蔡孟軻困於齊梁自是不遇其時寧關報應之理子胥無首馬遷腐下受誅取辱何可尤人至如協律見親權船得幸從此而言更不足怪周王漂杵致天之罰白起誅降行已之意是以七百之祚仍加姬氏杜郵之戮還屬武安昔漢問上計不過日蝕晉策秀才止於寒火前賢往士咸用為

難推古比今臣見其易然草萊百姓過荷恩私三折寒膠再遊金馬王言昭賁恩若有神占對失圖伏深悚懼尚書擢第以遜為當時第一十二月清河王岳為大行臺率衆南討以遜從軍明年顯祖納貞陽侯為梁主岳假遜大行臺郎中使於南與蕭脩侯瑱和解遜往來五日得脩等報書岳因與脩盟于江上大軍還鄴遜仍被都官尚書崔昂舉薦詔付尚書考為清平勤幹送吏部七年詔令校定羣書供皇太子遜與冀州秀才高乾和

瀛州秀才馬敬德許散愁韓同寶洛州秀才傅懷德懷
州秀才古道子廣平郡孝廉李漢子渤海郡孝廉鮑長
暄陽平郡孝廉景孫前梁州府主簿王九元前開府水
曹參軍周子深等十一人同被尚書召共判定時秘府
書籍紕繆者多遜乃議曰按漢中壘校尉劉向受詔校
書每一書竟表上輒言臣向書長水校尉臣參書大夫
公太常博士書中外書合若干本以相比校然後殺青
今所讎校供擬極重出自蘭臺御諸甲館向之故事見

存府閣即欲判定必藉衆本太常卿邢子才太子少傅
魏收吏部尚書辛術司農少卿穆子容前黃門郎司馬
子瑞故國子祭酒李業興竝是多書之家請牒借本參
校得失祕書監尉瑾移尚書都坐凡得別本三千餘卷
五經諸史殆無遺闕八年詔尚書開東西二省官選所
司策問遜為當時第一左僕射楊愔辟遜為其府佐遜
辭曰門族寒陋訪第必不成乞補員外司馬督愔曰才
高不依常例特奏用之九年有詔超除員外將軍後世

祖鎮鄴召入司徒府管書記及登祚轉授主書遷員外散騎侍郎天統初病卒

劉逖字子長彭城叢亭里人也祖芳魏太常卿父馘金紫光祿大夫逖少而聰敏好弋獵騎射以行樂為事愛交遊善戲謔郡辟功曹州命主簿魏末徵詣霸府世宗以為永安公浚開府行參軍逖遠離鄉家倦於羈旅發憤自勵專精讀書晉陽都會之所霸朝人士攸集咸務於宴集逖在遊宴之中卷不離手值有文籍所未見者

輒終日諷誦或通夜不歸其好學如此亦留心文藻頗
工詩詠天保初行定陶縣令坐姦事免十餘年不得調
乾明年兼員外散騎常侍使於梁主蕭莊還兼三公郎
中皇建元年除太子洗馬肅宗崩從世祖赴晉陽除散
騎侍郎兼儀曹郎中久之兼中書侍郎和士開寵要逖
附之正授中書侍郎入典機密兼散騎常侍聘陳使主
還除通直散騎常侍尋遷給事黃門侍郎修國史加散
騎常侍又除假儀同三司聘周使副二國始通禮儀未

定逖與周朝議論往復斟酌古今事多合禮兼文辭可
觀甚得名譽使還拜儀同三司世祖崩出為江州刺史
祖珽執政徙為仁州刺史祖珽既出徵還待詔文林館
重除散騎常侍奏門下事未幾與崔季舒等同時被戮
時年四十九初逖與珽以文義相得結雷陳之契又為
弟俊聘珽之女珽之將免彥深等也先以告逖仍付密
啓令其奏聞彥深等頗知之先自申理珽由此疑逖告
其所為及珽被出逖遂遣弟離婚其輕交易絕如此所

制詩賦及雜文文筆三十卷子逸民開府行參軍逃弟
譽少聰明好文學天統武平之間歷殿中侍御史兼散
騎侍郎迎勞陳使轉尚書儀曹郎周大象末卒於黎州
治中子玄道有人品識用定州騎兵參軍逃從子顗字
君卿祖廐魏尚書為高祖所殺顗父濟及濟弟琰俱奔
江南顗出後武定中從琰還北琰賜爵臨穎子大寧中
卒於司徒司馬顗好文學工草書風儀甚美歷瀛州外
兵參軍司空功曹待詔文林館除大理司直隋開皇中

鄜州司馬卒

荀士遜廣平人也好學有思理為文清典見賞知音武
定末舉司馬秀才迄天保十年不調皇建中馬敬德薦
為主書世祖時轉中書舍人狀貌甚醜以文辭見用曾
有事須奏值世祖在後庭因左右轉通者不得士遜姓
名乃云醜舍人世祖曰必士遜也看封題果是內人莫
不忻笑後主即位累遷中書侍郎號為稱職與李若等
撰典言行於世齊滅年卒

顏之推字介琅邪臨沂人也九世祖含從晉元東度官至侍中右光祿西平侯父勰梁湘東王繹鎮西府諮議參軍世善周官左氏學之推早傳家業年十二值繹自講莊老便預門徒虛談非其所好還習禮傳博覽羣書無不該洽詞情典麗甚為西府所稱繹以為其國左常侍加鎮西墨曹參軍好飲酒多任縱不脩邊幅時論以此少之繹遣世子方諸出鎮郢州以之推掌管記值侯景陷郢州頗欲殺之賴其行臺郎中王則以獲免被囚

送建業景平還江陵時繹已自立以之推為散騎侍郎
奏舍人事後為周軍所破大將軍李穆重之薦往弘農
令掌其兄陽平公慶遠書翰值河水暴長具船將妻子
來奔經砥柱之險時人稱其勇決顯祖見而悅之即除
奉朝請引於內館中侍從左右頗被顧眄天保末從至
天池以為中書舍人令中書郎段孝信將敕書出示之
推之推營外飲酒孝信還以狀言顯祖乃曰且停由是
遂寢河清末被舉為趙州功曹參軍尋待詔文林館除

司徒錄事參軍之推聰穎機悟博識有才辯工尺牘應對閑明大為祖珽所重令掌知館事判署文書尋遷通直散騎常侍俄領中書舍人帝時有取索恒令中使傳旨之推稟承宣告館中皆受進止所進文章皆是其封署於進賢門奏之待報方出兼善於文字監校繕寫處事勤敏號為稱職帝甚加恩接顧遇逾厚為勳要者所嫉常欲害之崔季舒等將諫也之推取急還宅故不連署及召集諫人之推亦被喚入勘無其名方得免禍尋

除黃門侍郎及周兵陷晉陽帝輕騎還鄴窘急計無所從之推因宦者侍中鄧長顓進奔陳之策仍勸募吳士千餘人以為左右取青徐路共投陳國帝甚納之以告丞相高阿那肱等阿那肱不願入陳乃云吳士難信不須募之勸帝送珍寶累重向青州且守三齊之地若不保徐浮海南度雖不從之推計策然猶以為平原太守令守河津齊亡入周大象末為御史上士隋開皇中太子召為學士甚見禮重尋以疾終有文三十卷家訓

二十篇竝行於世曾撰觀我生賦文致清遠其詞曰仰
浮清之藐藐俯沉奧之茫茫已生民而立教乃司牧以
分疆內諸夏而外夷狄驟五帝而馳三王大道寢而日
隱小雅推以云亡哀趙武之作孽怪漢靈之不祥旄頭
翫其金鼎典午失其珠囊瀍澗鞠成沙漠神華泯為龍
荒吾王所以東運我祖於是南翔晉中宗以琅邪王南渡之推琅邪人故稱
吾王去琅邪之遷越宅金陵之舊章作羽儀於新邑樹杞
梓於水鄉傳清白而勿替守法度而不忘逮微躬之九

葉頹世濟之聲芳問我良之安在鍾厭惡於有梁養傅

翼之飛獸

梁武帝納亡人侯景授其命遂為反叛之基

子貪心之野狼

武帝初養

臨川王子正德為嗣生昭明後正德還本特封臨賀王猶懷怨恨徑叛入北而還積財養士每有異志也初

召禍於絕域重發繫於蕭牆

正德求征侯景至新林叛投景景立為主以攻臺城

雖萬里而作限聊一葦而可航指金闕以長鑱向王路

而蹶張勤王踰於十萬曾不解其搯吭嗟將相之骨鯁

皆屈體於犬羊

臺城陷援軍並問訊二宮致敬於侯景也

武皇忽以厭世白

日黯而無光既饗國而五十何克終之弗康嗣君聽於

巨猾每凜然而負芒自東晉之違難寓禮樂於江湘迄

此幾於三百左衽浹於四方詠苦胡而永歎吟微管而

增傷世祖赫其斯怒奮大義於沮漳

孝元帝時為
荊州刺史

授犀

函與鶴膝建飛雲及舳艫北徵兵於漢曲南發餉於衡

陽

湘州刺史河東王譽雍州刺史
岳陽王謦竝隸荊州都督府

昔承華之賓帝寔兄

亡而弟及

昭明太子薨乃立
晉安王為太子

逮皇孫之失寵歎扶車之

不立

嫡皇孫驩出封
豫章王而薨

間王道之多難各私求於京邑襄

陽阻其銅符長沙閉其玉粒

河東岳陽
皆昭明子

遽自戰於其地

宣大勛之暇集子既損而姪攻昆亦圍而叔襲褚乘城

而宵下杜倒戈而夜入

孝元以河東不供船艚乃遣世子方等為刺史大軍掩至河東

不暇遣拒世子信用羣小貪其子女玉帛遂欲攻之故河東急而逆戰世子為亂兵所害孝元發怒又使鮑泉圍河東而岳陽宣言大獵即擁衆襲荊州求解湘州之圍時襄陽杜岸兄弟怨其見劫不以實告又不義此行率兵八千夜降岳陽於是遁走河東府褚顯族據投岳陽所以湘州見陷也行路彎弓而含

笑骨肉相誅而涕泣周旦其猶病諸孝武悔而焉及方

幕府之事殷謬見擇於人羣未成冠而登仕財解履以

從軍

時年十九釋褐湘東國右常侍以軍功加鎮西墨曹參軍

非社稷之能衛

童汪錡

闕

僅書記於階闥罕羽翼於風雲及

荆王之定霸始讎恥而圖雪舟師次乎武昌撫軍鎮於

夏汭

時遣徐州刺史徐文盛領二萬人屯武昌蘆州拒侯景將任約又第二子綬寧度方諸為世子拜中

撫軍將軍郢州刺史以盛聲勢

濫充選於多士在參戎之盛列慙四白

之調護厠六友之談說

時遷中撫軍外兵參軍掌管記與文珪劉民英等與世子遊處

雖形就而心和匪余懷之所說繫深宮之生貴矧垂堂

與倚衡欲推心以厲物樹幼齒以先聲

中撫軍時年十五

愾敷

求之不器乃畫地而取名仗禦武於文吏

以虞預為郢州司馬領城

防事委軍政於儒生

以鮑泉為郢州行
事總攝州府也

值白波之猝駭逢

赤舌之燒城王疑坐而對寇白詡拱以臨兵

任約為文
盛所困侯

景自上救之舟艦弊漏軍饑卒疲數戰失利乃
令宋子仙任約步道偷郢州城預無備故陷賊

莫不寢

煖而化鵠皆自取首以破腦將睥睨於渚宮先憑陵於

他道

景欲攻荊州
路由巴陵

懿永寧之龍蟠

永寧公王僧辯據巴
陵城善於守禦景不

能進奇護軍之電掃

護軍將軍陸法和破任約
於赤亭湖景退走大潰

犇虜快其

餘毒縲囚膏乎野草幸先生之無勸賴滕公之我保

推之

執在景軍例常見殺景行臺郎中正則
初無舊識再三救護獲免因以還都

劉鬼錄於岱宗

招歸魂於蒼昊

時解衣訖而獲全

荷性命之重賜銜若人以終

老賊棄甲而來復肆觜距之鵬鳶積假履而弑帝憑衣

霧以上天用速災於四月癸聞道之十年

臺城陷後梁武曾獨坐數

曰侯景於文為小人百日天子及景以大寶二年十一月十九日僭位至明年三月十九日棄城逃竄是一百二十日笋天道繼大數故文為百日言與公孫述俱稟十二而旬歲不同就狄俘於舊壤陷

戎俗於來旋慨黍離於清廟愴麥秀於空廬鼓鼓臥而

不考景鐘毀而莫懸野蕭條以橫骨邑閭寂而無煙疇

百家之或在

中原冠帶隨晉渡江者百家故江東有百譜至是在都者覆滅略盡

覆五宗

而翦焉獨昭君之哀奏唯翁主之悲絃

公主子女見辱見讎

經長

干以掩抑

長干舊顏家巷

展白下以流連

靖侯以下七世墳塋皆在白下

深燕

雀之餘思感桑梓之遺處得此心於尼甫信茲言乎仲

宣過西土之有衆資方叔以薄伐

永寧公以司徒為大都督

撫鳴劒

而雷咤振雄旗而雲罕千里追其飛走三載窮於巢窟

屠蚩尤於東郡挂邳支於北闕

既斬侯景烹屍於建業市百姓食之至於肉盡

鮑骨傳首荆州懸於都街

弔幽魂之冤枉掃園陵之蕪沒殷道是以

再興夏祀於焉不忽但遺恨於炎崑火延宮而累月

景侯

既平我師樓櫓失火燒宮殿蕩盡也

指余擢於兩東侍昇壇之五讓欽漢

宮之復覩赴楚民之有望攝絳衣以奏言忝黃散於官

謗

時為散騎侍郎奏舍人事也

或校石渠之文

王司徒表送祕閣舊事八萬卷乃詔比校

部分為正御副御重雜三本左民尚書周弘正黃門郎

彭僧朗直省學士王珪戴陵校經部左僕射王褒吏部

尚書宗懷正員外郎顏之推直學士劉仁英校史部廷

尉卿殷不害御史中丞王孝純中書郎鄧藎金部郎中

徐報校子部右衛將軍庾信中書郎王固晉

安王文學宗菩業直省學士周確校集部也時參柏梁

之唱顧甌甌之不算濯波濤而無量屬瀟湘之負罪

陸納

兼岷峨之自王

武陵王

竚既定以鳴鸞脩東都之大壯

詔司

農卿黃文
超營殿

驚北風之復起慘南歌之不暢

秦兵繼來

守金城

之湯池轉絳宮之玉帳

孝元自晚陰陽兵法初聞賊來頗為厭勝被圍之後每歎息知

必敗

徒有道而師直翻無名之抗

孝元與宇文丞相斷金結和無何見滅是

師出無名

民百萬而囚虜書千兩而煙燭溥天之下斯文盡

喪

北於墳籍少於江東三分之一梁氏剝亂散逸湮亡唯孝元鳩合通重十餘萬史籍以來未有也兵敗

悉焚之海內無復書府

憐嬰孺之何辜矜老疾之無壯奪諸懷而

葉草踏於塗而受掠冤乘輿之殘酷軫人神之無狀載

下車以黜喪拵桐棺之藁葬雲無心以容與風懷憤而

惻恨井伯飲牛於秦中子卿牧羊於海上留劍之妻人

銜其斷絕擊磬之子家纏其悲愴小臣恥其獨死實有

媿於胡顏牽疴痕而就路

時患脚氣

策駕蹇以入關

官疲驢瘦馬

下無景而屬蹈上有尋而亟蹇嗟飛蓬之日永恨流梗

之無還若乃玄牛之旌九龍之路土圭測影璿璣審度

或先聖之規模乍前王之典故與神鼎而偕沒切仙宮

之永慕爾其十六國之風教七十代之州壤接耳目而

不通詠圖書而可想何黎氓之匪昔徒山川之猶曩每

結思於江湖將取弊於羅網聆代竹之哀怨聽出塞之

嘹朗對皓月以增愁臨芳樽而無賞自太清之內釁彼

天齊而外侵始蹙國於淮潁遂壓境於江潯

侯景之亂齊氏深斥

梁家土宇江北淮北唯餘廬江晉熙高唐新蔡西陽齊昌數郡至孝元之敗於是盡矣以江為界也獲仁

厚之麟角剋雋秀之南金爰衆旅而納主車五百以覓

臨

齊遣上黨王渙率兵數萬納梁貞陽侯明為主

返季子之觀樂釋鍾儀之鼓

琴

梁武聘使謝挺徐陵始得還南凡厥梁臣皆以禮遣

竊聞風而清耳傾見日之

歸心試拂著以貞筮遇交泰之吉林

之推聞梁人返國故有弄齊之心以

丙子歲旦筮東行吉不遇泰之坎乃喜曰天地交泰而更習坎重險行而不失其信此吉卦也但恨小往大來耳後遂吉也 譬欲泰而更楚假南路於東尋乘龍門之一曲

歷砥柱之雙岑冰夷風薄而雷响陽度山載而谷沉倅

挈龜以憑濬類斬蛟而赴深昏揚舲於分陝曙結纜於

河陰

水路七百里一夜而至

追風颺之逸氣從忠信以行吟遭厄

命而事旋舊國從於採芑先廢君而誅相訖變朝而易

市

至鄴便值陳興而梁滅故不得還南

遂留滯於漳濱私自怜其何已謝

黃鵠之廻集而翠鳳之高峙曾微令思之對空竊彥先

之仕纂書盛化之旁待詔崇文之裏

齊武平中署文林館待詔者僕射陽

休之祖孝徵以下三十餘人之推專掌其撰修文殿御覽續文章流別等皆詣進賢門奏之

珥貂蟬

而就列執麾蓋以入齒

時以通直散騎常侍遷黃門郎也

欸一相之故

人

故人祖僕射掌機密吐納帝令也

賀萬乘之知己祗夜語之見忌寧

懷璧之足恃諫譖言之矛戟惕險情之山水由重裘以

寒勝用去薪而沸止

時武職疾文人之推蒙禮遇每攜創痍故侍中崔季舒等六人以諫

誅之推爾日隣禍而儕流或有毀之推於祖僕射者僕射察之無實所知如舊不忘予武成之燕

翼遵春坊而原始唯驕奢之是修亦佞臣之云使

武成奢侈

後宮御者數百人食於水陸貢獻珍異至乃厭飽棄於
厠中禪衣悉羅縠錦繡珍玉織成五百一段爾後宮掖
遂為舊事後主之在宮乃使駱提婆母陸氏為
之又胡人何洪珍等為左右後皆預政亂國焉惜染絲

之良質情琢玉之遺祉用夷吾而治臻昵狄牙而亂起

祖孝徵用事則朝野翕然政刑有綱紀矣駱提婆等苦
孝徵以法繩已譖而出之於是教令昏僻至于滅亡

誠怠荒於政度惋驅除之神速肇平陽之爛魚次太原

之破竹

晉州小失利便棄軍還并
又不守并州奔走向鄴

寔未改於弦望遂

關

文

及都

關

而升降懷墳墓之淪覆迷識主而狀

人競已棲而擇木六馬紛其顛沛千官散於犇逐無寒

瓜以療饑靡秋螢而照宿

時在季冬故無此物

讎敵起於舟中胡

越生於輦轂壯安德之一戰邀文武之餘福屍狼藉其

如莽血玄黃以成谷

後主彝後安德王延宗收合餘燼於并州夜戰殺數千人周主欲退

齊將之降周者告以虛實故留至明而安德敗也

天命縱不可再來猶賢死廟

而慟哭乃詔余以典郡據要路而問津

除之推為平原郡據河津以為

彝陳之計

斯呼航而濟水郊鄉導於善鄰

約以鄰下一戰不剋當與之推入陳

不羞寄公之禮願為式微之賓忽成言而中悔矯陰疎

而陽親信諂謀於公主競受陷於姦臣

丞相高阿那肱等不願入南又

懼失齊主則得罪於周朝故疎閒之推所以齊主留之
推守平原城而索船度濟向青州阿那肱求自鎮濟州
乃啓報應齊主云無賊勿忽
忽遂道周軍追齊主而及之
曩九圍以制命今八尺而

由人四七之期必盡百六之數湊屯

趙郡李穆叔調妙占天文算術齊初

踐祚計止於二十八年至是如期而滅

予一生而三化備荼苦而蓼辛

在陽

都值侯景殺簡文而篡位於江陵達孝元覆滅至此而三為七國之人

鳥焚林而鍛翮魚

奪水而暴鱗嗟宇宙之遼曠愧無所而容身夫有過而

自訟始發矇於天真遠絕聖而棄智妄鎖義以羈仁舉

世溺而欲拯王道鬱以求申既銜石以填海終荷戟以

入秦亡壽陵之故步臨大行以逡巡向使潛於草茅之下甘為畎畝之人無讀書而學劍莫抵掌以膏身委明珠而樂賤辭白璧以安貧堯舜不能榮其素樸桀紂無以汙其清塵此窮何由而至茲辱安所自臻而今而後不敢怨天而泣麟也之推在齊有二子長曰思魯次曰敏楚不忘本也之推集在思魯自為序錄

袁爽字元明陳郡人梁司空昂之孫也父君方梁侍中爽蕭莊時以侍中奉使貢莊敗除琅邪王儼大將軍諮

議入館遷太中大夫

韋道遜京兆杜陵人曾祖蕭隨劉義真渡江祖儒自宋
入魏寓居河南洛陽官至華山太守道遜與兄道密道
建道儒竝早以文學知名道密魏永熙中開府祭酒因
患恍惚沉廢於家道建天保末卒司農少卿道儒歷中
書黃門侍郎道遜武平初尚書左中兵加通直散騎侍
郎入館加通直常侍

江旰字季陽濟人也祖柔之蕭齊尚書右丞叔父革梁

都官尚書旰梁末給事黃門郎因使至淮南為邊將所執送鄴稍遷鄭州司馬入館除太尉從事中郎轉太子家令齊亡逃還建業終於都官尚書

睦豫字道閑趙郡高邑人父寂梁北平太守道閑弱冠州舉秀才天保中參議禮令歷晉州道行臺郎大理正奉車都尉入館遷員外散騎常侍尋兼祠部郎中隋開皇中卒於洛州司馬豫宗人仲讓天保時尚書左丞

朱才字待問吳都人蕭莊在淮南以才兼散騎常侍副

袁爽入朝莊敗留鄴稍遷國子博士諫議大夫齊亡客
遊信都而卒

荀仲舉字士高潁川人世江南仕梁為南沙令從蕭明
於寒山被執長樂王尉粲甚禮之與粲劇飲齧粲指至
骨顯祖知之杖仲舉一百或問其故答云我郗知許當
是正疑是麀尾耳入館除符璽郎後以年老家貧出為
義寧太守仲舉與趙郡李粲交歎粲死仲舉因至其宅
為五言詩十六韻以傷之詞甚悲切世稱其美

蕭慤字仁祖梁上黃侯曄之子天保中入國武平中太子洗馬

古道子河內人父起魏太中大夫道子有幹局當官以彊濟知名歷檢校御史司空田曹參軍自袁爽等俱涉學有文詞荀仲舉蕭慤工於詩詠慤曾秋夜賦詩其兩句云芙蓉露下落楊柳月中疎為知音所賞

贊曰九流百氏立言立德不有斯文寧資刊勒乃眷淫靡永言麗則雅以正邦哀以亡國

北齊書卷四十五

北齊書卷四十五考證

樊遜傳常為兄仲優饒○一本作其兄仲以造龜為業
常優饒之北史同

顏之推傳小注又第二子綏寧度方諸為世子○按綏
寧度三字未審毛氏本同

白詡拱以臨兵○按此用顧榮事詡當作羽

郊鄉導於善鄰○郊疑効字之譌

韋道遜傳曾祖蕭隨劉義真度江祖儒自宋入魏寓居

河南洛陽官至華山太守○蕭疑肅字之謫

臣範

按

魏書及北史韋閬傳並云從子崇字洪基父肅隨劉義真渡江又崇二子猷之休之休之子道建道儒道遜之父不可考然當祖崇此云祖儒似有誤北史不載道遜

朱才傳字待問吳都人○都當作郡

北齊書卷四十五考證